

洛陽縣誌

重修洛陽縣志卷之十六

武進龔崧林麈園編次

藝文之五

賦

漢

東都賦

班固

東都主人喟然而嘆曰痛乎風俗之移人也予竄秦人矜
夸館室保界山河信識昭襄而知始皇矣烏睹大漢之云
為乎夫大漢之開元也奮布衣以登皇位繇數期而創萬

代蓋六籍所不能談前聖靡得言焉當此之時功有橫而
當天討有逆而順民故婁敬度勢而獻其說蕭公權宜而
拓其制時豈泰而安之哉計不得以已也吾子曾不是睹
顧曜後嗣之末造不亦暗乎今將語子以建武之治永平
之事監於太清以變子之惑志往者王莽作逆漢祚中缺
天人致誅六合相滅於時之亂生民幾亡鬼神泯絕罄無
完樞郭周遺室原野厭人之肉川谷流人之血秦項之災
猶不克半書契以來未之或紀故下人號而上訴上帝懷
而降監乃致命乎聖皇於是聖皇乃握乾符闡坤珍披皇

圖稽帝文赫然發憤應若典雲霆擊昆陽憑怒雷震遂起
大河跨北嶽立號高邑建都河洛紹百王之荒屯因造化
之盪滌體元立制繼天而作系唐統接漢緒茂育羣生恢
復疆宇勲兼乎在昔事勤乎三五豈特方軌並跡紛綸后
辟治近古之所務蹈一聖之險易云爾哉且夫建武之元
天地革命四海之內更造夫婦肇有父子君臣初建人倫
實始斯乃伏羲氏之所以基皇德也分州土立市朝作舟
輿造器械斯乃軒轅氏之所以開帝功也恭行天罰應天
順人斯乃湯武之所以昭王業也遷都改邑有殷宗中興

之則馬即土之中有周成隆平之制馬不階尺土一人之
柄同符乎高祖克己復禮以奉終始允恭乎孝文憲章稽
古封岱勒成儀炳乎世宗案六經而校德耿古昔而論功
仁聖之事既該而帝王之道備矣至於永平之際重熙而
累洽盛三雍之上儀修袞龍之法服鋪鴻藻信景鑠揚世
廟正雅樂神人之和允洽羣臣之序既肅乃動大輅遵皇
衢省方巡狩窮覽萬國之有無考聲教之所被散皇明以
燭幽然後增周舊修洛邑扇巍巍顯翼翼光漢京于諸夏
總八方而為之極於是皇城之內宮室光明闕庭神麗奢

不可踰儉不能侈外則因原野以作苑填流泉而為沼發
蘋藻以潛魚豐圃草以毓獸制同乎梁鄒誼合乎靈囿若
乃順時節而蒐狩簡車徒以講武則必臨之以王制考之
以風雅歷騶虞覽四驥嘉車攻采吉日禮官整儀乘輿乃
出於是發鯨魚鏗華鍾登玉輅乘時龍鳳蓋琴麗瑟鑿玲
瓏天官景從寢威威容山靈護野屬御方神雨師汎灑風
伯清塵千乘雷起萬騎紛紜元戎竟野戈鋌彗雲羽旄掃
霓旌旗拂天焱焱炎炎揚光飛文吐燭生風欲野歆山日
月為之奪明邱陵為之搖震遂集乎中囿陳師按屯駢部

曲列校隊勒三軍誓將帥然後舉烽伐鼓申令三驅輜車
震激驍騎電驚由基發射范氏施御弦不睥禽轡不詭遇
飛者未及翔走者未及去指顧倏忽獲車已實樂不極盤
殺不盡物馬踰餘足士怒未深先驅復路屬車案節於是
薦三犧效五牲禮神祇懷百靈覲明堂臨辟雍揚緝熙宣
皇風登靈臺考休徵俯仰乎乾坤參象乎聖躬日中夏而
布德瞰四裔而抗稜西盪河源東澹海濬北動幽崖南耀
朱垠殊方別區界絕而不鄰自孝武之所不征孝宣之所
未臣莫不陸龍言水慄奔走而來賓遂綏哀牢開永昌春王

三朝會同漢京是日也天子受四海之圖籍膺萬國之貢
珍內撫諸夏外綏百蠻爾乃盛禮興樂供帳置乎雲龍之
庭陳百寮而贊群后究皇儀而展帝容於是庶實千品旨
酒萬鍾列金罍班玉觴嘉珍御太牢饗爾乃食舉雍徹太
師奏樂陳金石布絲竹鐘鼓鏗鈞管絃燧煜抗五聲極六
律歌九功舞八佾韶武備泰古畢四夷間奏德廣所及傑
休瓌離罔不具集萬樂備百禮暨皇歡決群臣醉降烟煜
調元氣然後撞鐘告罷百寮遂退於是聖上覩萬方之歡
娛又沐浴于膏澤懼其侈心之將萌而怠於東作也乃申

舊章下明詔命有司頒憲度昭節儉示太素去後宮之麗飾損乘輿之服御抑工商之淫崇興農桑之盛務遂令海內棄末而反本背偽而歸真女修織紵男務耕耘器用陶匏服尚素元耻織靡而不服賤奇麗而弗珍捐金於山沈珠於淵於是百姓滌瑕盪穢而鏡至清形神寂漠耳目弗營嗜慾之源滅廉恥之心生莫不優游而自得玉潤而金聲是以四海之內學校如林庠序盈門獻酌交錯俎豆莘莘下舞上歌蹈德詠仁登降飲宴之禮既畢因相與嗟嘆元德讜言宏說咸含和而吐氣頌曰威哉乎斯世今論者

但知誦虞夏之書詠殷周之詩講義文之易論孔氏之春秋罕能精古今之清濁究漢德之所繇唯予頗識舊典又徒馳騁乎末流溫故知新已難而知德者鮮矣且夫僻界西戎險阻四塞修其防禦孰與處乎土中平夷洞達萬方輻湊秦嶺九峻涇渭之川曷若四瀆五嶽帶河沂洛圖書之洲建章甘泉館御列仙孰與靈臺明堂統和天人太液昆明鳥獸之圃曷若辟雍海流道德之富游佚踰侈犯義侵禮孰與同履法度翼翼濟濟也子徒習秦阿房之造天而不知京洛之有制也識函谷之可闢而不知王者之無

外也主人之辭未終西都賓矍然失容逸巡降階悚然意
下捧手欲辭主人曰復位今將受子以五篇之詩賓既卒
業乃稱曰美哉乎斯詩義正乎揚雄事實乎相如匪唯主
人之好學蓋乃遭遇乎斯時小子狂簡不知所裁既聞正
道請終身誦之

詩另載

洛都賦

傅毅

惟漢元之運會世祖受命而弭亂體神武之聖姿握天人
之契贊尋往代之規兆仍險塞之自然被崑崙之洪流據
伊洛之雙川挾成臯之巖阻扶二嶠之崇山分畫經緯開

正塗軌序立廟祧面朝後市歎息起雰霧奮袂生風雨覽
正殿之體制承日月之皓精騁流星於突陋追歸鴈於軒
軫帶螭龍之疏鏤垂菑菑之敷榮顧濯龍之臺觀望永安
之園藪淨清沼以泛舟浮翠虬與元武桑宮蘭館區制有
規后帥九嬪躬勅工女近則明堂辟雍靈臺之列宗祀揚
化雲物是察其後則有長岡邛阜屬以首山通谷岷岷石
瀨寒泉於是乘輿鳴和按節發輟列翠蓋方龍輶備五路
之駉服檻三辰之旗旂傳說作僕義和奉時千乘雷駭萬
騎星鋪絡繹相屬揮沫揚鑣群仙列於中庭發魚龍之巨

偉羨門拊鼓偃佗操鷹講武農隙較獵圃田搜出林以集
禽激通川以禦獸跨乘黃射遊麋弦不虛控目不徒睇解
腋分心應箭墮夷然後弭節容與淶水之濱垂芳餌於清
流出旋潁之潛鱗

德陽殿賦

李尤

開三階而參會錯金銀於兩楹入青陽而窺總章歷戶牖
之所經連璧組之潤漫雜虬文之蜿蜒爾乃周閣迴匝峻
樓臨門朱闕巖巖崖峨朶雲青鎖禁門廊廡翼翼華蟲詭
異密采珍綺達蘭林以西通中方池而特立果行鬱茂以

萋萋鴻鴈沛裔而來集德陽之北斯曰濯龍葡萄安石蔓
延蒙籠橘柚含桃甘果成叢文櫬曜水光昭煌煌

東京賦

張衡

安處先生於是似不能言憊然有間乃莞爾而笑曰若客
所謂未學膚受貴耳而賤目者也苟有胸而無心不能節
之以禮宜其陋今而榮古矣由余以西戎孤臣而悞穆公
於宮室如之何其以溫故知新研覈是非近於此惑周姬
之末不能厥政政用多僻始於宮隣卒於金虎羸氏搏翼
擇肉西邑是時也七雄並爭競相高以奢麗楚築章華於

前趙建叢臺於後秦政利背長距終得擅場思專其侈以
莫已若乃構阿房起甘泉結雲閣冠南山征稅盡人力殫
然後收以大半之賦威以參夷之刑其遇民也若薙氏之
芟草既蘊崇之又行火馬慄慄黔首豈徒跼高天躋厚地
而已哉乃救死於其頸毆以就役唯力是視百姓弗能忍
是用息肩於大漢而欣戴高祖高祖膺籙受圖順天行誅
秋朱旗而建大號所推必亡所存必固掃項軍於垓下繼
子纓於軹塗因秦宮室據其府庫作洛之制我則未暇是
以西匠營宮目翫阿房規模踰溢不度不臧損之又損然

尚過於周堂觀者狹而謂之陋帝已譏其泰而弗康且高
既受命建家造我區夏矣文又躬自菲薄治致升平之德
武有大啓土宇紀禪肅然之功宣重威以撫和戎狄呼韓
來享咸用紀宗存主饗祀不輟銘勲彝器歷世彌光今捨
純懿而論爽德以春秋所諱而為美談宜無嫌於往初故
蔽善而揚惡祇吾子之不知言也必以肆奢為賢則是黃
帝合宮有虞總期固不如夏癸之瑤臺殷辛之瓊室也湯
武誰革而用師哉盍亦覽東京之事以自寤乎且天子有
道守在海外守位以仁不恃隘害苟民志之不諒何云巖

險與襟帶秦負阻於二關卒開項而受沛彼偏據而規小
豈如宅中而圖大昔先王之經邑也掩觀九隩靡地不營
土圭測景不縮不盈總風雨之所交然後以建王城審曲
面勢沂洛背河左伊右澗西阻九阿東門于旋盟津達其
後太谷通其前迴行道平伊闕邪徑捷乎輶轅太室作鎮
揭以熊耳底柱輟流鐔以大岨温液湯泉黑丹石緇王鮪
岫居能鼈三趾處妃攸館神用挺紀龍圖授羲龜書畀妣
召伯相宅卜維洛食周公初基其繩則直葺宏魏舒是廓
是極經途九軌城隅九雉度堂以筵度室以几京邑翼翼